


Bernina Lago Bianco:
L'illustraziun porta la
data da l'avust (17)93.



Ils 3 da fanadur 1806
en Val Müstair.

Ina ovra monumental da Conrad Escher

Il nov cudesch cuntegna era panoramas e massa skizzas dal Grischun

DA CLAUDIA CADRUVI / ANR

■ Il cudesch fascinescha alpinistas, amis da l'art, geologas, geografis, istorichers e grafichers. El ha sulet dus dischavantatgs: La paisa da ca. 3 kilos ed il pretsch da 338 francs. «Hans Conrad Escher von der Linth, il grond politicher e filantrop svizzer, n'ha mai gi en senn da daventar artist. Tuttina ha el laschà enavos cun ses dissegns ina ovra che munta insatge singular.» Cun quels plets introducescha René Brandenberger il cudesch «Die ersten Panoramen der Alpen». Brandenberger presidescha la fundaziun «Linth-Escher» che ha edì cun quest cudesch quasi tut las skizzas ed ils panoramas che Escher ha fatg. Tschient onns en quests dissegns stads bandischads en in archiv da la ETH a Turitg. Nagin s'interessava per els.

Renconuschi dals experts d'art

Il 1971 avra Gustav Solar ina stgaffa en la biblioteca geologica da la ETH a Turitg. 700 skizzas, cartas e panoramas «crodan en ses mauns». Igl è la lavur – quasi cumpletta – che Conrad Escher ha stgaffi tranter il 1791 ed il 1822. Ils felegs èn bain mantegnids. Il colorit è brillant.

Solar examinescha quest stgazi. El fa pliras publicaziuns. Plaunsieu reconuschan era ils experts ils dissegns sco lavur artistica.

Escher ha enconuschi mintga regiun da la Svizra. El è i a girond per tut las valadas e sur mintga pass. Cun blier engaschi ha el intercuri il sistem da las Alps. Ses regl da skizzar e registrar mintga culm era nunstancabel, sco sch'el less stgaffir in lexicon cumplet dal mund alpin.

Fotografia remplazza dissegn


Perquai ch'el leva metter tut sin palpiri, ha Escher sviluppa il panorama da 360 grads. «Igl è cumprovà che Escher ha disegna, or d'agen impuls e senza influenza d'ordvart, ils 13 da fanadur il 1792 l'emprim panorama da 360 grads da las Alps dal piz da la Fibbia en il massiv dal Gottard.»

Escher aveva, sco era Goethe, studegià pliras ciencias. Pir en il 19avel tschientaner han ins separà las differentas ciencias



Conrad Escher von der Linth, naschi ils 24 d'avust 1767, mort ils 9 da mars 1823.

Il 1813 passa Escher Valendau. Per el munta la via tras il grip «ein maulerischer Anblick».



e l'art. La geologia ha alura fatg in svilup rasant. Skizzas abstractas e fotografias èn daventadas las illustraziuns impurtantas per la geologia. Ils dissegns dad Escher èn tuttenina stads antiquads. Ins ha zavrà ora els e caviglià en la stgaffa da l'institut geologic.

Panoramas da la Surselva

A chaschun da l'onn dals culms da l'ONU ha la fundaziun «Linth-Escher» publitgà per l'emprima giada l'ovra cumpleta dad Escher.

Sut il chapitel Surselva cuntegna il nov cudesch 24 dissegns e quatter panoramas. Las paginas cun ils panoramas pon ins faudar ora. Il panorama dal Badus ha ina lunghezza da 180 cm.

Ils auter panoramas mussan ina vista visavi Mustér, la regiun dal Lucmagn e la vista dal Scopì anor.

Pli interessantas ch'ils panoramas èn magari las skizzas, fatgas a la svelta, forsà durant ina pausa da viadi. Escher na ha mai fatg lungas cun detagls. Las vischancas ha el sulet marcà cun ina chasa u



Il 1819 è Escher sin il Scopì e skizzascha il Tödi (Dödi).

in bajetg significant. Impurtant per il geolog eran la finala ils culms.

Notizias

Ma in zic vita duvrava para era in scienza: Mintgatant cumparan a l'ur d'in dissegn intginas personas, p. ex. purs, viandants, in pèr u animals. Sin ina skizza, da Cumpadials anor, ha el disegna a l'ur ina fila da chauras che passan sur in piogn. Sias notizias lätiers en tun original: «Das auch hier furchtbar gewesne Unwetter... hatte fast überall die Brücken und Staege weggerissen bey Campodels... da aber sich

die Ziegenherde des Dorfes schon seit 2 Tagen jenseits abgeschnitten befand, so waren die Einwohner damit beschäftigt, auch über jene neuen Nebenarme des dicktrüben Rheins Staege zu machen...» (28 d'avust 1817).

Aquarels da l'Engiadina

Il 1806 ha Escher visità l'Engiadina, la Val d'Alvra e la Val Müstair. Da quest viadi datti bieras illustraziuns coloradas, nua che Escher ha fatg dapli breggia cun detagls. I dat vistas detagliadas dal Pass dal Fuorn, dal Piz Palü, dal Morteratsch,

Scaletta, dal Bernina e dal Piz Linard. Pitschnas picturas d'aquarel ha Escher fatg p. ex. da Cinuos-chel e da Guarda.

Tras il Grischun central è Escher passà pliras giadas. En il cudesch datti tranter auter maletgs da Bravuogn, Seglinas, d'Andeer u era in panorama cun la Tumleatga ed il Beverin.

Las indicaziuns geograficas che Escher ha nudà sin ils dissegns paran ozendi mintgatant curiosas. Per Tödi scriva el p. ex. Dödiberg, per Vilan Seewiserberg.

«Die ersten Panoramen der Alpen», Linth-Escher-Stiftung, Baeschlin Glarus. 452 paginas ed ina cd-rom. Pretsch 338 francs. Glarus 2002. ISBN 3-85546-120-1.

L'um cun il titel «von der Linth»

Hans Conrad Escher ha vivi dal 1767 fin il 1823. El è stà l'iniziant dal «Linthwerk». Quai è l'emprima iniziativa generala d'util public che la Svizra ha prendi a maun. Ins ha bajegià il canal da la Linth per sentiar las palis ed ils morasts tranter il Lai Rivaun ed il Lai da Turitg. La populaziun da questa regiun ha patì onns a la lunga dad inundaziuns e malsognas.

I ha cuzzà 16 onns fin ch'il canal è stà bajegià. L'environ lavuran fin 1000 personas vi dal canal.

Per ses engaschi ha Escher obtegnì il titel «von der Linth» – ina onuraziun ch'ins na ha suenter mai pli dà ad insatgi en Svizra.

Era la finanziaziun dal «Linthwerk» è stada in'ovra da pionier. Damai che la Svizra era suenter l'occupaziun tras las truppas da Napoleon bravamain sblundregiada, ha Escher proponi da finanziar il canal cun daners d'acziar. Il register d'acziar munta oz in fundus istoric economic. El inditgescha tgi che veva da lez temp insumma anc daners danvanz.



La Val Müstair a l'entschatta dal 19avel tschientaner.